

松溜膏遺文



二

二

高

卷

遺

文

南陵涂乃昌署



南朝宋元昌景

瑞安潁川書舍輯刻

瑞安楊衙街  
集古齋發行

籀膏遺文序

籀膏遺文，民國五年，其家曾為刊行一部分，即今籀膏述林十卷是也。書非先生手定，體例頗舛駁。蓋編輯宗旨，既以述著為歸，則文之無關於學術者，所當刪汰也。而編中若謝天申贊、若福甯鎮總兵事狀之類，文備應酬，濫以入錄，正式學術論文，如瑞安縣志局總例六條、瑞安縣志局採訪人物條例、採訪溫州遺書約古、履記序、周禮政要敘之類，反在屏棄，本末倒植，何可通乎？昔汪中述學外篇，多錄性韻之文，識者尚以名實不符為病。矧孫氏此編，不區篇帙，而採

輯又不逮汪書之詳賅乎？曩予草蕪膏學會宣言書，定整理孫氏遺書計劃，尤以此次其遺文爲斤斤，蓋有鑒乎此也。夫學者萃心力於專著，瑣瑣篇章，後人每忽視之，以致散亡愈易，整理綦難，可慨也。且專著，裁篇命名，出自作者，後人整理，校勘之外，無餘事矣。遺文則散在各處，攢摭既畢，次以校勘，發凡起例，又有編纂之煩難焉。述林之陋，以未盡攢摭之功，而急爲編纂之業耳。同里楊文子林，閩鄉邦遺獻之廢墮，纂甌海續集，如干卷，孫氏遺文之未入述林者，多所甄錄，攢摭之功，不可沒也。惟總集體裁，泛及諸家，不

能有所軒輊而躡膏學術在社會上之位置所當特  
出故遺文亦宜有專集夫總集家數既詳篇章斯略  
此遺文所宜別行者一置備全集注意則僅一部分  
物質金錢兩不經濟此遺文所宜別行者二陳君繩  
夫漢體此惜廣楊丈所輯別為單行拾遺補闕成籀  
膏遺文二卷雖不敢云孫氏文筆具盡於此而耳目  
所及亦已備矣且卷帙既減校雠益精審是亦此編  
勝於總集之點也儻他日更取此編而與述林通融  
挹注以關於學術之文悉入述林其餘另為一編或  
竟廢述林之名而併為一集則第三步之工作亦不

難因此編而踵見也。此吾播膏學會同志之職責，而大有望乎繩夫者也。是爲序。民國十五年仲春李笠識於甌江寓廬。



孫籀膏遺文敘

吾甌自宋南渡以來人物蔚起彪炳文章踵相接也  
顧兵火迭徑欲其遺著存者不能什一可不悲哉孫  
徵君仲容先生學博古今著有周禮正義墨子間詁  
札邊述林槩文舉例諸書既已風行海內矣未刊者  
尚有尚書駢枝廣韻姓氏刊誤經邊溫州古甌記古  
籀餘論若干種遺文卽述林之餘也皆殘篇復簡之  
散畱於人間者余自束髮以來最喜收臧鄉先哲遺  
著每遇邑中臧有遺文斷簡莫不矜惜而邊錄之而  
孫先生之文猶深愛之臧之筭篋久而不發至乙丑

歲南陵徐積餘觀察囑錄儀徵劉壽曾溫州經籍志  
敘始檢得籀膏遺文二十餘篇意欲亟付梨棗因篇  
月過希實難彙佈適吾邑楊翁子齡前輩收臧鄉哲  
遺著甚富並著有甌海續集三十餘卷孫太僕琴西  
先生有永嘉  
集稿本八十餘卷楊  
翁續集即補其闕者所錄孫先生遺文四十餘篇與  
余舊錄合并爰成此集刊而行之亦海內學士所欲  
覩歟昔民國十五年元宵日邑後學陳準敘於湫澇

齋

循齋遺文目次

卷上

壽序

項太恭人八旬壽序

胡雨帆先生七十壽序

袁鐵梅先生七十壽序

徐太宜人暨王太安人壽序

張廣雅尚書六艷壽序

胡芳谷夫婦六十壽序

鑑亭林老先生七十壽序

敘

午奧林氏譜敘

上田戴氏族譜敘

溫州古甌記敘

周禮正要敘

已見籍族述卷五

東瀛觀學記敘

補學齋詩鈔敘

陸山寺募鐘敘

東游日記敘

師竹齋吟草敘

題跋

書影宋鈔殘本永嘉四靈詩後

刻竹軒襍纂跋

刻橫塘集跋

刻蒙川遺稿跋

書校顧亭林詩後

餐菊軒詩草跋

曾祠百詠跋

書于常侍易注疑證後

跋王居士觀塔銘

窳橫詩質跋

五周先生集

碑銘

誥授光祿大夫浙江溫處兵備道童公神道碑  
誥授光祿大夫頭品頂戴二品銜賞戴花翎浙  
江溫處兵備道童公墓誌銘

誥授叅節將軍晉贈廣威將軍雲騎尉温州中  
營千總許君暨子廣威將軍雲騎尉瑞安營  
候補外委許君兩世墓志銘

卷下

書

與漕生書

与邹景叔書

見朋壽堂  
紀說

与劉恭甫書

見春秋左氏  
傳舊注疏證

與邃某書

與趁齋書

與江蘇教育總會書

與某君書

與曲園書

與次饒書

七通

與春臣太公祖書

又一通

予在星洲

祭文

奉謝知閣

佃

孫編修希旦

兩先生神主崇祀學

淵書院祭文

祭林左髓文

雜著

瑞安縣志局總例六條

瑞安縣志局采訪人物條例

徵訪溫州遺書約

改紅封為櫃完以其羨餘充學款議

六十辭壽啟

詩詞

青田端木太雀廷廷試卷臨黃度經敬題絕句

題焦山定陶鼎拓本



題吉日癸巳石刻二首

鶴亭孝廉臣新莽宜子孫竟拓本寄贈既爲小  
跋奉求董正意有未盡律成二律

送郭激震入湘調查礦務

題埃及石刻拓本

題楊嘯村明經世環靜觀圖

題天籟閣品茶圖

題趙飛燕玉印拓本

題董臨禊帖

自題變法條議逸

新羅山人龍樸圖維揚馬氏故物也叔方姻丈  
頃從永嘉故家得之遂爲所藏書畫之冠承  
示屬題謹成小詩藉志眼福并求誨正

周伯龍妹倩以明隆丞兵科給事素園李公遺  
印見示作詩紀之

叔方姻丈以陽明先生書簡真跡見示俗冗豪  
集未遑攷証敬題小詩以志欽慕竝求誨正  
舊見鐵冶亭尚書刊入帖內有陽明矯亭說  
石聞在京師庚子兵燹不索尚存否故埒及  
之

410  
6  
氣 某

題 洪海籌甌江語別圖

題 岳忠莖玉印鈐本後

題 硯

籀膏遺文卷上

瑞安孫詒讓著

邑後學陳

準晉輯

壽序

項太恭人八旬壽序代家大人作

光緒癸未七月十九日爲我舅母薛太恭人八秩壽辰於是哲嗣攬谷粟亭兩表弟將率孫奉卮爲太恭人壽而以侑觴之文爲屬衣言忝廁諸甥於太恭人徽儀淑德聞之最悉故輒陳其大畧以爲千秋之祝而非夫尋常頌禱之辭也蓋太恭人系出廬村薛氏爲宋敷文閣待制薛公良朋之苗裔元明以來久爲



吾鄉望族幼習女訓兼工組紉及長歸我先舅氏若  
坵先生爲繼室先舅氏伯仲四人仲爲雁湖處士邃  
學潛德不事舉于業有王仲任皇甫士安之風尤工  
吟咏所著且甌集詩格醇古凌轅盛唐浙東詩人殆  
無倫比次舅氏几山學博以名孝廉爲富陽校官所  
學尤淹博天算校讐奄綜乾嘉漢學諸大師之長儲  
書數萬卷丹鉛殊遍先舅氏幼承兩昆之緒論益肆  
力經史於學無所不窺而又從伯氏受詩法得其微  
旨而著耕讀亭詩鈔八卷與且甌集並盛行於世一  
門昆李富有纂述尤吾鄉之嘉話也先舅氏既篤嗜

文翰不復問家人生產董理家政綜治繁襍率賴太  
恭人之力爲多至於持尚儉樸屏絕華靡雖膺榆狄  
之榮而荆布之風至老無改見者若不知爲富家媪  
也旣而攬谷粟亭兩表弟並以積學雋才上稟慈訓  
宇量高雅器識純素庠序蜚聲鬱爲時棟諸婦珩璜  
鍼縷婉孌柔嘉咸守太恭人之家法兢兢勿敢違文  
孫則又嶄然見頭角瑤環瑜珥起膺德門於是益歎  
太恭人之賢其克享上壽爲吾鄉女宗固其宜也曩  
者同治癸酉值太恭人七十壽辰攬谷粟亭旣舉稱  
觴之祝而余弟鏘鳴爲文以紀之時衣言方備官江

東未得躋堂上壽今者告歸家衛閉門卻掃數與攬  
谷栗亭晤譚輒從問太恭人起居羨其含飴弄孫之  
樂爲不可及而太恭人則又八秩矣竊念外家耆舊  
稀如晨星而太恭人耄耆彊固獨以大年厚德為姻  
黨之宗法斯固不可以無紀也輒縷陳之以答攬谷  
栗亭之意恭鞫晉膳之暇敬為太恭人誦之儻為加  
餐而一笑歟

胡雨帆先生七十壽序 代家大人作

余讀周官經大司徒職以保息六養萬民首曰慈幼  
竊歎先王壽人之政經緯萬物者至精且備後世育  
嬰之舉蓋權輿於此顧古人經世大法日就淪墮其  
一二端存者或浮慕其名而忘其精意之所在苟非  
得其人理而董之則雖良法美意亦且徒為具文未  
君叔之言曰理國以得賢為本不信然哉吾邑舊無  
育嬰之堂同治間余弟藻田始與羅雨樵大令商推  
勗建邑之賢士大夫相與贊其事者蓋十數人而總  
其成始終無怠者則咸推胡君雨帆之功為最是真



能探慈幼壽人之精意而課其實效者歟君之族自  
宋元以來世居吾邑胄姓繁衍科第蟬聯邑中推爲  
甲族君少承先業約守儒素爲養親計屈就縣掾非  
其志也旣而以圍寇功議敘得按察使照磨於是君  
之家業益昌而名亦益盛夫曹吏之選惟漢最重勲  
業如蕭曹經師如鄭康成氣節如范孟博皆出於其  
中至於以才望致位公輔者尤不可枚舉蓋其時爲  
牧守者無不妙簡僚屬與其選者亦皆得竭其材力  
以佐郡縣之治故其政效之卓人材之衆爲後世所  
不能及君素通達世務而加之以綜敏之才誠篤之

操顧求於繩墨不能如古人之暢行其志既以功登  
薦牘爲監司屬官而又未得真除以大展其才此余  
所爲君歎惜不置者也雖然育嬰之舉所以拯諸幼  
之不育者而登之仁壽也君之董斯事也綜理詳密  
精力逾人爲選擇保姆優給廩餼歲時督其肥瘠苛  
疾而謹調護之堂之經用皆悉心鉤考日有計月有  
要必使絲毫無浮冒如是者逾十年其所全活者無  
算然則吾邑人之賴君以壽者不其多乎前此君六  
十生辰余弟爲文以紀之今君年七十矣戚友復爲  
君稱祝而以侑觴之文屬余余稔知君生平敦尚風

誼自少而課其弟仲巖明經以力學遂以恩貢生待  
詮校官今仲巖卒而君撫其諸孤與君之子小帆茂  
材咸擅文業有聲於時至其贊成義舉如重建文廟  
及復飛雲江義渡諸大端皆賴其力爲多以及施棺  
槨修橋路掩骼埋齒諸善事尤難悉數而育嬰之功  
爲尤鉅然則君之所以壽吾邑人者既如此則合邑  
人之壽以祝君之壽俾永於無窮其孰曰不宜故謹  
書之以爲尚義者勛非徒積善獲報之常語也

袁鐵梅先生七十壽序

夫昴宿騰輝，覬其祥者五老；斗躔遵度，占其應者九  
魁。昭融戩穀，符五百之昌期；茂豫喬椿，塚八千之瑞  
紀。是以箕疇錫敘，首斂福之休徵；絳譜疑年，衍積旬  
之壽筴。靡不騰聲董史，蜚茂周篇；固知握大年之券，  
不藉餌木餐芝，膺蕃祉之符，無俟歌松頌柏者矣。維  
我老伯鐵梅先生者，乃新栽公祖之尊甫也。誕膺星  
精蔚為人瑞，武夷毓秀，幔亭標仙蹟之奇；甌冶承華，  
嶠海濬靈源之潤。六世清德，載萃於文中萬石家風；  
首推於漢代先生。珽照觴年，琮敷卅歲學勤，焯掌慧

擅覃心索幼安逸羣之量便異常童齊遙欣局幹之  
才自成名器其侍大封翁霽堂先生也服勤懃懃含  
愉翼翼腴冬鱗夏養志無方枕清衾溫承惟顏蠹漏  
初下橋衡之奉必虔雞人始號管籥之佩已飭烝烝  
色養陳元方表象於穎川粲粲思柔東廣微補詩於  
周雅既而伯兄上舍蘭穎早芬荆枝遽萎先生以北  
平最季實元大宗偉節高名奄超伯氏遂乃上稟慈  
規下領家政有無均於族鄙澤潤覃於宗祊彭城羣  
從皆俊惠之有聲江州義門信雍睦之無間兼之德  
配老伯母熊太恭人戟門秉曜月館含章端操有蹤

口則可範用能裏夫子以劭德口威姑而勛莊閨儀  
玉照菜春與梁案齊輝閨範瓊標郝法與鍾型並茂  
珈蓼節步自符德象之篇揄狄章文彌肅女宗之訓  
德門懿槩允哉備已先生爰逮壯年遂通朝籍晉升  
華省懋贊秋曹彌雀角以平反展驥足以錯祥刑克  
允明慎種於心田憲典敷寬端平開於肺石爽鳩司  
讞必持三宥之平瑞芳觸邪遂格十愆之俗既而脫  
屣軒冕息影林泉續仲長樂志之篇著歐公歸田之  
錄北海尊酒坐客滿而忘憂西華練裙故人聞而生  
感有平仲三口之惠無孝標五交之譏閨門雍穆陳

太邱之素風隣里順和王彥方之隱德花開吉貝克  
蘇鶉衣之寒倉散瑞彝豫籌雁戶之急固已里紉厚  
德人頌賢聲矣又以講舍失修橫經罕集先生乃慨  
捐精鏐載興崇構丹艘煥采樂綵庀材紺園文棟大  
擴鹿洞之規方領青衿重萃鵝湖之講凡茲義舉曷  
罄揄揚是宜厚福載膺蕃釐駢集揚家武啓雙鑲報  
其將昌于公活人駟馬知其必大於是清聲鵲起哲  
嗣鴻騫蘭開室香芝呈庭瑞伯播芹穎之芬文高麟  
角仲晉薇垣之秩榮按鶴班賢昆既拊鄂交輝少公  
復桂林特秀我新栽公祖卽其季也緝柳勛勤瞻喬

秉訓北溟鵬運東浙鳧飛剖符大末既惠政之口敷  
奉檄口興復雄麾之屢攝迄於佐治東甌紆綬下邑  
清風載穆與頌臚懽建康之治寶冠百城公孫之才  
爰攝五縣遂乃築養堂而棠蔭連視加餐則菜衣  
錦繞絃歌萬戶齊吹口華之笙桃李千行遙接喬椿  
之館先生乃導迎善氣口勅官箴慰其愛日之忱勸  
以戴星之口趙廣漢之衡事夙本家風汲長孺之發  
倉實由庭誥是宜介考成之繁祉占平秩於延洪琳  
篇益算口菜采南國之謠玉案凝釐都荔譜東房之  
奏茲柔兆書辰天正紀月先生以杖國之年展懸弧



之慶於是玳瑁筵開狻猊香篆老人星朗宿麗南躔  
高會仙多尊酒東海伯仲承歡於玉口少公贊治於  
黃堂從子則紫綾緋魚文孫亦瑤環瑜珥自天錫嘏  
五花之鳳詒騰輝行地成仙四葉之燕詒濟美洵椿  
庭之至樂蔗境之彌甘口等夙紉通德於蘭芬久口  
季方之樾蔭拜龐公於牀下侍口叟於觴間欣屆令  
辰爰摭碩行綠鱗丹首永賡通錄之篇謬檢銀文崇  
晉長生之笈將見鸞章三錫偕鳩至而榮頌鶴算百  
年歷紀鯉庭之上孝謹序

徐太宜人暨王太安人壽序

余讀漢劉子政列女傳八篇所述逾百人大抵揚推懿烈揭著隆槩未有紀其年壽者繼又得明嘉禾陳懋仁壽者傳自帝王以迄國老庶老凡三篇耆德遐齡綴緝略備而復不及壽數蓋禮宗高行不必皆有上壽而躋上壽者則又或出窮鄉蓬華芳徽闕寂爲紀載所不及固知賢壽兼備彤史罕聞而况兩世賢母胡考相承蕃釐純德一門總萃若今永嘉童母徐太宜人暨令媳王太安人者信一代之人瑞豈徒閭里之嘉話哉徐太宜人者蘭溪童儀軒先生之德配

也先生精究靈素以醫名一時性嗜山水年三十遊  
永邑愛其山水之秀遂家焉設藥肆以自給暇則爲  
人治疾多神效太宜人甫笄而歸儀軒先生愛敬備  
至資性尤慈惠生丈夫子五人女三年四十而先生  
捐館撫諸子教訓極嚴長子琴舫先生尤端謹亦以  
精醫紹其家學既冠而娶同邑王氏即今太安人是  
也太安人亦事姑以孝而相夫以勤儉生子女各三  
人皆以賢聞琴舫之卒也太安人年五十矣力持門  
戶次第為諸子畢婚嫁條理秩然絲毫不以煩徐太  
宜人蓋姑婦同符徽音克嗣郡中士大夫論賢者必

以童氏兩母爲稱首，嘻何其盛歟！今年二月爲徐太宜人九秩壽辰，而王太安人亦適躋七秩。諸戚友將與兩母同舉介壽之觴，而徐太宜人之三子、口口先生四子、口口先生及三女歸郭氏者，年亦逾六十。諸孫三人、曾孫九人、曾孫女四人環繞膝下，烝烝色養。元孫口口又已周歲，瑤環、瑜珥、蘭茁庭階，郡邑長吏將以五世同堂聞於大府，表闡以寵之。鄉里傳誦以爲盛事，余與太宜人令孫雪帆爲雅故，是不可以無述也。謹略述兩壽母之賢，以議大年劭德，慶延累葉，爲古今罕覩之嘉瑞。而自今以往，兩壽母之康彊膺

福以登於期頤尤未有父者也余更願濡毫紀之矣

張廣雅尚書六艷壽序

光緒二十有二年丙申八月吾師廣雅尚書張公六  
艷誕辰凡著弟子之籍者咸獻言以為千秋之祝詒  
讓獨以銜恤家居不得與稱慶鼎丁酉而公以官年  
六十禮官上聞天子優禮耆德將舉錫釐之典寰宇  
翹首以瞻異數而詒讓亦適屆祥禪雖學識疎淺於  
公之盛德大業未能仰贊萬一而於自強興學之情  
畧有所窺斯固不可以無述也竊惟公自妙年通籍  
即以鴻文碩學受穆廟特達之知回翔詞館已蔚然  
負公輔之望鼎今上光紹大統祇承懿訓知公尤新

遂以侍從之臣建節晉粵江鄂領南洋欽差大臣崇  
樹勳勤震愴異域若援越拒法籌俄備倭以遠開鐵  
路治卹政簡軍籌精鍊金製械諸大政閱謨偉略不  
可勝舉而公之密勿敷陳與夫獨居溪念所尤致意  
者則以爲中國自強之道莫先於興學開物成務究  
極原本俾圓顛方趾之倫昭然發其蒙蔽非夫流俗  
變法之論也蓋公自在詞館即與當代賢達研經講  
學通漢宋之涂轍氓中西之區畛論著名通海內傳  
誦及外膺疆寄益崇闡斯義於粵立廣雅書院於鄂  
立兩湖書院廣集方聞之士俾孚講經義治事之學

而開府江東以迄旋節漢上復建議設水陸師學堂以培人材設自強學堂以開民智規制宏遠方興未艾故公敷歷中外經緯萬端而興學以求自強尤公經世更化之微情所謂百世以俟聖人而不惑者歟詔讓昔治周官經而知周之軍制與學校相輔而立蓋王畿治軍以六鄉七萬五千家爲正卒而六遂副之遠郊之內地不逾四同而其立學也則爲鄉庠者六爲州序者三十爲黨序者百有五十遂之屬別亦如之而郊野都鄙與夫枝室家塾數復倍徙於鄉遂西周之隆所以張皇六師鞭撻夷貊者實本於是今



歐美諸強國學堂雖盛方斯邈矣至其教學之方端緒精備經典或未能盡詳而推其總要則惟德行道藝師儒兼重綜貫萬原今西人所治天算地形光重化電諸學蓋已略賅於其中故周衰學校廢闕而諸子百家猶有能綜述之者若曾子單居禹之論天管子吾鄉行之論地列禦寇墨翟之論景鑿均重多奇偉精眇之說而兵技巧家言則墨氏之書尤詳然則西人所爲挾其長以雄視五洲者皆成周教學之餘緒也獮秦燔書經籍淪佚周官道藝之傳闕焉不續繇歷千載益陵夷不講而西人遂乃窮其智巧以自

名其學俗儒蒙固亦復幽冥而莫知其原學校廢而  
道藝微斯固古今盛衰之原抑亦中外強弱之樞館  
歟自道光海上用兵以來海內學者蔚然爭論富強  
邵陽魏氏首擘攷四裔地理形勢間涉兵權謀家之  
論其言閎侈或未易施行安吳包氏始探原於河漕  
農桑以植內治之本湘鄉曾文正公揭禮治一原之  
旨持論尤精而以勘平寇亂未遑更治惟公覃思闕  
攬肇建興學之議提綱握要其意深遠今者朝廷開  
儲材之館以廣致茂異之士東西士大夫亦皆焯然  
知貧弱之原由於學之不講公私校舍次第興立明

奠通譯風尚大昌其端皆自公發之然則遊稽周典  
近綜西藝培人才開民智興學以自強所以鞏國家  
億萬之祚而爲中國四萬萬人所繫命者在是即公  
之壽攷所爲永於無窮者亦在是斯非名世大賢之  
盛軌乎詒讓伯督無似昔嘗侍公燕閒獲聞古今學  
術之派別中年早衰學殖荒落重以孤露餘生廢業  
累歲曩時所治百不識一唯是禮經爲夙爲誦說者  
猶能舉其要畧竊謂周官鄉遂立學以德行道藝治  
軍教民之義與公所陳建者余若合符輒綴輯之用  
證興學自強之愔而即以爲靈命難老之頌小子學

禮惟夫子其教之矣謹叙



胡芳谷夫婦六十壽序

吾邑城面山負海形勢雄厚唐宋以來故家巨族名  
賢達士項背相望而胡氏尤為蕃盛自宋乾道淳熙  
間胡少賓先生為止齋陳文節公學友與葉正則蔡  
行之諸先生相頡頏華胄聯千年無替迄今猶為  
儒族文學科第之盛甲於一邑世德隆遠代有名碩  
薦紳之士率皆經明行修以禮法相摩切而其種學  
績文著年厚福爲鄉里所欽仰若余姻戚芳谷明經  
者尤其魁傑也君挺資穎特幼嗜文業承其先姻文  
棣甫廣文義方之訓束髮受經即以精敏輒其儕伍

甫弱冠應童子試即冠其曹遂以文藝受知督學使  
者吳和甫侍郎拔入府學為名諸生復以屢試高等  
補上舍生顧性靜退負其雋才邃學而超然於榮利  
之表既膺鄉貢即不復應科舉惟以讀書課子為樂  
尤善談論每揚摧古今治亂多造微之論聞者無不  
心折而襟懷冲淡被服儒素見之者不知其為高門  
華閥也元配項孺人以詩禮華胄作儷高賢奉紫晉  
饋肅敬無懈哲嗣筱谷國學文孫公哲公劬公七輩  
皆篤志儒業君為延師督課益自淬厲咸以妙年雋  
采有聲於時行將接孟蠶泮光紹家業而曾孫肇燧

方在髫齡而姿稟英特瑤環瑜珥望而知爲佳兒蓋  
君年甫逾五十卽已孫曾綿衍歲時伏臘一門羣從  
內外諸孫數十人奉觴奉觴爲壽者環繞膝下天倫  
之樂盎然溢於家庭之內此尤非鄉曲舊族之所能  
企也余家自太僕君移居域內之邨與所居距君家  
不數盞往還最密曩者先姻文棣甫先生以碩學輝  
映先達領袖後進與先君爲文字交雖少賓之與止  
齋不是過也余少時嘗得侍棣甫先生讌譚與聞緒  
論以兩世交遊姻婭知君之學行尤悉今年七月爲  
君六旬誕辰適項孺人年亦周甲諸姻黨將稱觴爲



君壽而以祝延之文爲屬蓋君雖席豐履泰而歛然不以自足其志趣之醇與福澤之備求之於古郭林宗陳仲舉之倫殆無多讓而且年逾五十四葉重光福祉蕃萃尤爲鄉里所罕聞也蓋其純懿溫粹之性得於天者旣厚而冲懷曠抱尤足以迓和而禔福則其克享天年非徒故家喬木靈秀所鍾抑亦行誼之篤有以握其券也輒敬綜緝所聞以備惇史之祝若夫年彌高而德彌劭繇斯而晉秩於無疆則固未有艾爾謹序

鑑亭林老先生七十壽敘

吾邑地濱大海東鄉沿海數十里潮汐挾泥沙上下  
坻積畱滯久而成田所謂塗田者無慮數十萬畝綿  
亘全鄉高者宜稻麥下者長萑葦民資以為生顧恆  
以水為患往歲風潮沒田無算闔鄉士民咸以為憂  
會里之耆德鑑亭林君議建長隄以捍潮護田諸鄉  
咸善其舉迺相與賡續興築隄成而水患大紓鄉人  
咸謂非君之力不及此適君年七十誕辰戚友將舉  
觴為壽而屬余為文以紀之蓋君之功在鄉里甚偉  
相與歌舞而頌禱之斯固不可以無述也君世居東

鄉之小典學夙為名族少負敏達之材為鄉里推重  
咸豐季平陽會匪構亂邑城戒嚴東鄉諸紳議治團  
以圍寇時君年甫逾冠卽與其事募資集餉其功最  
多寇平大吏以君功上聞晉把總職銜時粵匪初退  
君運未至括蒼途遇廣德州童子王慶祥詢知為寇  
所掠流徙無所依攜之歸撫養教誨與諸子等長復  
以女妻之送至皖訪其家則兄某尚在見弟驚喜詢  
得君撫育狀感激涕零廣德人聞之咸頌君之德不  
置同治癸卯鄉士張君仲嘉以秋試病歿於杭州君  
適以事在杭為經紀其喪鉅細無遺岑崎山麓樂清

林君爵建屋爲鄉民度棺之所歲久傾圮君見之心  
惻捐資修建一鄉賴以無暴齒之患君樂善好義鄉  
里有爭訟皆曲爲排解雖頑獷咸翕服俛受約束性  
溫恭與物無忤而嚴於嫉惡中埭姦民徐永吉誘民  
開花會君控之官嚴治之賄風以息蓋其勇於任事  
大率類此君稟資素壯少健步嘗步行至福州率日  
行百里不以爲苦今耆年躋七秩而頤養完粹神明  
不衰兩哲嗣受君義方之訓咸治儒業以孝謹有聲  
於時君既備天倫之樂又素豪飲每春秋佳日酒餘  
高臥曠無塵累荀卿云美意延年於君徵之已余素

知君之賢近以築海隄時相商榷過從尤數每聞其  
親行泥淖間巡視督課不辭勞瘁故隄成而君所居  
里工尤精善他鄉多奉為程式自是而沿海萬頃咸  
成沃壤鄉之士民凡食君之賜者方額手相慶願垂  
之無窮而所為祝君之壽者亦相與為無窮詩不云  
乎樂只君子遐不眉壽蓋闔鄉士民所樂為君誦者  
豈徒戚友頌禱之私哉謹敘

敘

午奧林氏譜敘

余家自宋以來世居二十五都集善鄉之峴霞距午  
奧不及一里山水深秀居其地者多大族若林氏亦  
其一也林氏舊居永嘉自康熙間海警從均奧移居  
午奧嶺根至今二十一世矣族姓蕃盛咸以耕讀自  
樂其風俗之美爲一鄉之冠邑中諸舊族莫能及也  
余少時嘗識林君廷賡者讀書習武材識敏練與先  
伯兄稷民先生游甚洽晚復習賈漫游南洋呂宋錫  
蘭及英屬新加坡法屬西貢各處識其風土歸輒復

倍徒之利以是振其家業今林君物故十餘年而諸子皆恂恂習禮法克守其遺業不替今年林君之子培恩以所修家譜來示余屬之敘余觀其譜紀述詳實不矜飾闕閎而於祠墓祀田所紀最悉斯足爲儒族光矣猶憶總角時交游戚友迄今數十年多零落不復存余亦鬢髮蕭然有老大之慨而猶得見故鄉舊家世載清德以相與樂此承平其欣幸為何如也爲敘其冊首以示來者

上田戴氏族譜敘

戴氏之先蓋出於宋之戴公風俗通所謂或氏於謚  
戴蓋宣穆是也其支派見於唐林寶元和姓纂者凡  
有五望曰濟北曰譙國曰吳興長城曰魏郡斥邱曰  
河東桑城斥邱之族在唐有參知政事胄右僕射道  
生並致身宰相故斥邱戴氏爲唐望族歐陽永叔世  
系表紀之其後有元昭者避地入閩居於長谿元昭  
孫謫復遷永嘉於是斥邱之戴又有永嘉一派永嘉  
戴氏盛於宋自臨江教授述以名德碩儒爲元豐九  
先生之一教授從孫文瑞公溪益恢其緒爲南渡名



臣入宋史儒林傳餘如大理少卿楠參知政事慶灼亦皆以才望擅名於世蓋永嘉戴氏之盛幾越唐斥邱而上之矣至明世有諱瑯者文端之六世孫也始居永嘉南鄉之上田數百年來支派繇衍代有名人儒雅之風於今不替於是永嘉戴氏言望族者又推上田上田舊有宗譜然僅草創未爲定本今茂才六峯先生與其族之賢者懼其久而譌脫也因謀葺修焉以其彙示余余受而讀之體例精當敘次詳明可以傳信於後於是益知戴氏之多賢也抑余聞之譜謀之體原於世本上以維宗法之窮下以儆族誼之

薄例至善矣至於故家華胄閱閱相承則其世次事  
跡之詳尤非尋常敝族所可比蓋其積累者然矣顧  
傳世既久經修愈多則所謂旁行斜上之圖勢不能  
無口口難明之憾今如戴氏之譜首載世次表相傳  
爲文端所定刻於石者宜其詳確可據矣然元和姓  
纂引戴氏狀云戴德之後裔孫景珍後魏口州從事  
景珍生胄胄生道國公仲孫仲孫生至德右僕射生  
良紹唐書世系表所載亦如之今上田譜乃云漢侍  
中憑之後且以胄為始祖至德為第二世祖而無景  
珍仲孫兩世至德子亦無良紹名則與林氏所述不

同又宋樓鑰攻媿集中有戴俊仲厚墓誌銘載其三  
世之諱曰天休曰臨曰端夫今上田譜臨子五無端  
夫名孫十一無厚名又與攻媿所述不同若此者昔  
之所謂礪鑿者也在今日則不得不在闕疑之例嗚  
呼此六峰先生與其族人所以汲汲然急於修譜者  
歟六峰先生名佐宣敦儒好善戚族無間言而先生  
父丹九先生以忠厚起家尤急於義舉嘗口口建祠  
以為闔族烝嘗之地余娶於諸丹九先生之外孫也  
聞其行詣最悉因附書之以詔後人焉

溫州古覽記敘

晉儀徵阮文達公嘗謂浙中漢晉碑刻甚少獨專文  
敗垣牆角間嘗有見者故其志兩浙金石錄漢至五  
代專文逾八十種而溫州未有著錄者近年嘉善戴  
教授咸弼著東甌金石志始於瑞安隆山得明因寺  
宋大觀脩塔專而詒讓別得永嘉松臺山淨光塔宋  
元祐熙寧諸專并拓以詒之成箸於錄然未嘗見唐  
以前專也光緒己卯秋詒讓侍家大人歸自江寧里  
居多暇與二三同志若林祁生慶衍周伯龍瓏中龍  
琛輩恣意游覽窮搜古刻偶得梁天監斷專於邑之

東郭輒相與傳觀矜爲創獲繼又得晉升平宋元嘉  
諸專率皆斷裂文字或剝蝕不具第以其舊物有紀  
年悉收并之復拓以詒戴君咸謂吾鄉金石之古無  
逾是者雖殘缺猶寶貴也今年十月家大人以蓋竹  
先塋封土命詒讓往視工歸時道過邑之廿四都下  
灣傭者爲言十餘年前黃氏造塚楮山取土得古塚  
其專皆隱起有花紋字畫粲然可辨試登山觀之塚  
已破壞殆盡零甃滿地檢視其文則晉泰和三年作  
也拾其完善者數函攜歸以示林周諸君咸驚嘆爲  
得未曾有閱數日復攜工往爲脩葺并搜剔遺甄所

得甚夥鄉農聞余得甌皆相與聚觀則詫曰是系系者何遽珍重若是某邨某山破塚堍埋其甌迺亦皆類此蓋各鄉舊甌出土者甚多樵牧者習見之初不知其爲古物也則相率道余往求之短屐長鑱尋訪累日得晉至梁甌無慮數十種迺知荒坵廣隧間零落者不可勝算惜曩時無過問者邨農輒取以楮牀坐竈率多毀滅今之塵存者廼其千百中之一二然所得猶若是蓋亦幸矣既而鄉人之以古甌來告者日衆輒偕林周諸君訪致之又苟及於它縣咸有所獲檢校其目以視文達所錄兩浙甌文數殆過之其

文字多完具可讀因撫刻爲温州古蹟記通若干種  
爲若干卷昔宋劉逮洪适馬居易婁機諸人集漢隸  
蓋多采輒文此記所撫雖多晉以後物其文取足紀  
年月姓名無它記述然其字畫奇古篆隸咸備異文  
詭體多與漢魏六朝碑板相合間有古里聚官秩氏  
族尤足資考證區區陶瓦遂爲吾鄉文獻之徵是誠  
不可以無述也至於隊文輒整日出不窮後之所獲  
當復倍蓰於是將隨時續增之焉

周禮政要敍

中國變法之議權輿於甲午而極盛於戊戌蓋倭變而中阻政法未更而中西新故之辯舛馳異趣已不勝其譁聒夫政之至精者必協於羣理之公而通於萬事之變一切勿講而徒以中西新故畫區畛以自隘吾知其懵然一無所識也中國開化四千年而文明之盛莫尚於周故周禮一經政法之精詳與今泰東西諸國所以致富強者若合符契然則華盛頓拿破崙盧梭斯密亞丹之倫所經營而講貫今人所指爲西政之最新者吾二千年前之舊政已發其端吾



政教不修失其故步而薦紳先生咸茫昧而莫知其原是亦綴學者之恥也辛丑夏天子眷念時艱重議更法友人以余嘗治周禮屬摺摭其與西政合者甄緝之以備財擇此非欲標揭古經以自張其虛憍而飾其窳敗也夫亦明中西新政之無異軌俾迂固之士廢然自反無所騰其喙焉余書凡二卷都四十篇雖疎漏尚衆而大致略具漢儒不云乎爲治不在多言顧力行何如耳誠史張今法集吾羣力而行之不疑則此四十篇者以致富彊而有餘其不能也則雖人懷龜賈之禁戶誦杜馬之書其於淪胥之痛庸有

救於豪傑乎嗚呼世之論治者可以鑒矣

Blank text area with vertical lines, possibly containing faint or illegible text.

東瀛觀學記敘

吾國興學堂之議亦屢變矣甲午以前朝廷方銳意於  
經筵南北洋並備學堂始發其端猶未及於講學也  
逮戊戌辛丑兩奉明詔廣開學堂而後自京師臣廷  
各行省府廳州縣接踵而興然而承數千年政教之  
敝驟議興學迂儒俗吏既徒驚怖泰西學執之精而  
未知所津逮一二振奇之士志誠而慮疎則又欲舉吾  
國學子之略通舉業者授以逆譯之書冊將謂轉眴  
而蔚成通才足應時需久之而所望百不售一議者遂  
以學堂爲詬病而少年穎偉之才迺相與聯袂東渡

游學日本者歲以數千計夫以彼三十年之教育其勝於吾今日擬設之學堂固不可以道里計然吾有國有民廼自放棄其教育使轉受教育於他人非計也而以今日吾國之學堂教育之無方惜爾國民於普通之知識尚闕焉其未逮其施教也恆扞格而不通其受教也若茫乎其無畔岸於此而遂侈然自足相與終古則其效仍虛懸而不可期然則博觀精攷采異域之長以裨我之闕其必不可以已矣吾郡學堂之開始於壬寅諸邑次第興舉瑞安先成而平陽樂清繼之二三君子相與究心學務亦咸莫妙簡

俊才激厲其志氣而馴進之道藝然而希望太驟管  
理未周授課無等執業不恆故陳義頗高而於普通  
之知識轉有所未及其弊亦略等焉吾友平陽劉君  
次饒湛深經術淹達時務與陳君子蕃從事於平邑  
學堂者有年喟吾國教育之未能盡善也廼與子蕃  
東游日本攷察學務自彼東京大學以逮邨町眾小  
學靡不周歷又與彼都賢士大夫反覆商推折衷至  
當應時記錄積彙盈篋其返也裛輯其精要爲觀學  
記以餉學者其大指在於掣究師範以成教員而多  
設冢學以陶鑄少年學子至於管理之方教科之冊

無不采彼之長以裨吾之闕其論之精者與周官經  
大小戴記多相符合信不刊之作也夫大學道藝之  
精端緒繇頤匪盡人所能企也要惟是小學者養國  
民之資格而導之以普通之知識則圓顛方趾之倫  
有生而具特無教育以宣究之則淪於羅窳霧闇而  
莫能自振故東西洋諸強國民無論男女貧富必強  
迫曲誘俾以時入小學堂用擴充其知識而後恣其  
所從事蓋學齡既屆而普通之知識尚闕則不可以  
爲人國民既蕃而普通之教育未周則不可以爲國  
雖有奈端倍根之學拿破崙納不遜之並將安所藉

手以自立吾國時局沾危介處衆彊之間其可不憬  
然知所反乎次饒既爲此記又以其政察所得者徧  
語其鄉人不數月而江南一鄉冢學堂卽成十有四  
區平邑學務將從此大興瑞安矐乎後矣讓讀其書  
欽歎玩繹愧未能逮輒揭其閱愒以告吾黨亟相與  
從事於普通之教育而無徒爲高論吾國學務其庶  
有覲乎





補學齋詩鈔敘

吾邑胡氏自宋南渡以來世爲望族名賢魁士相望  
不絕咸豐季年先君子以侍講出守安慶引疾旋里  
於時同邑詩人惟胡棟甫廣文丈詩格雅澹在陶韋  
之間與先君子倡和最密吟箋往還殆無虛日廣文  
族弟桂樵孝廉亦以豪飲工詩與先君子爲文字交  
時詒讓年才十三四粗解文義瞻侍欽歎未能奉手  
受教也旣而先君子以湘鄉太傅之招復宦遊吳皖  
逮光緒己卯以江藩改太僕南歸則兩胡先生皆已  
先逝曩時詩友無一存者惟孝廉從子榕村大令妙

年雋才濡染家學亦工於詩先君子嘗食沙喫爲詩  
索里人和作惟榕村與亡友林祁生慶衍詩最佳劇  
賞之胡氏詩學繼起有人雅音爲不墜矣嗣黃漱蘭  
侍郎文以通政歸田嘗於城東江濱建飛雲閣祀同  
邑詩人屢與榕村縱飲其間酒餘興發高哦聲驚四  
座詒讓亦時參末席媿未能學步也旣而榕村成進  
士以縣令分發江蘇大吏知其材屢檄勾當重要政  
務客春又攝篆金壇時當朝廷議更法凡百新政次  
第畢舉旣又遘荒歉捐奉治振簿書昧目日無暇晷  
然猶不廢吟咏其敏才雅尚殆非尋常俗吏所能及

也頃以金壇受代聽鼓多暇迺哀近作并舊編都為  
一册刊版既成馳書見示且索序其端詒讓受而讀  
之則感時事之多艱念昔遊之不再凡抑鬱憤懣之  
懷悉於詩發之其詩亦益工駸駸乎登劍南石湖之  
堂信足以賡續家集輝映先達已詒讓少治經生之  
業嘗學爲詩而不能工孤露餘生意興衰落誦榕村  
詩欽歎玩繹媿弗能逮輒述家世舊聞與師友并離  
之迹爲敘以答榕村風尚更新舊學廢誣鄉里之間  
詩事殆絕斯則榕村與不佞所爲同慨喟不能已者  
與



隆山寺募鐘敍

古之爲鐘所以魏律立均四縣金石首重鑪鑄鏗豁  
之響以蘇神人厥義闕矣自雅樂銷沉胡音襍奏易  
鐘爲鏡而八音同律遂成絕響齊罇宋鐘塵存古器  
敍擊之卽樂府無傳嗜古者爽然傷之浮屠象教肇  
興天竺梵經東派妙法遐暢於是以鐘磬之法器宣  
大慈之妙音當其辰鐘一敍聲震人天六道四生昭  
發聳聵禪門古德悟徹真如往往依聲見道究厥本  
原此與儒門之樂教固冥符而遙契矣我邑隆山雄  
峙城東面江左海遊眺斯萃隆山寺者唐宋古刹也

舊有巨鐘用節梵誦攷擊既久剝泐孔多不足以宣  
揚法音振動羣聽斯亦琳宮一缺典也住持蓮初志  
興寶刹首庀法器將以廣募檀施重付鳧氏所冀高  
齋脩士華閱巨公鑒厥誠心贊興元化慨助精鏐俾  
成善舉則芳名鑄勒得與吉金樂石永垂不朽非第  
福田利益人天欽仰已也

東游日記敘

國家自道咸以來始大弛海禁與東西洋諸國開權  
場互市海上校其壘理多張騫甘英所未窺者皆列  
國籍通使節皇華四達數萬里重瀛如履畿聞斯亦  
亙古未有之盛也士大夫游歷別國者斐然有述往  
往著為游記其佳者奇聞壯見足髣輜軒之采視唐  
玄奘宋徐兢元邱長春所記錄個乎遠過之矣余友  
平陽黃君愚初振奇士也以學行淹粹為沈仲復中  
丞所賞異修書俾游日本而我駐日使臣汪芝房編  
修復飲金以助其行數旬之間徧歷彼國東西京以



歸日本與我國同文字其賢士大夫多通華學邦域  
雖褊小然能更其政法以自振立愚初之行也蓋欲  
諮其政俗得失以上裨國家安攘之略顧不獲久畱  
其歸也僅攜佛氏密部佚經數十冊又爲余購彼國  
所刊善本經籍數種皆非其初意也既又出日記一  
小冊示余識其游歷所至甚悉夫中外政治得失異  
同其精微之故文字不能宣其奇偉廣遠者又非下  
士所 言然則此冊者其麤捐之迹耳何足以見愚  
之志哉然愚初之意甚盛方將徧游五大洲以擴其  
聞見遊記之作殆倍蓰而未已則以此冊爲之權輿

始亦愚初所樂為乎既刊成為序以廣其意且以見  
愚初之志之不盡於是也

案所得善本經籍凡五種一鈔本紹興校正本草  
一部一松碕明刻影宋本爾雅一冊一宋本邈千  
字文注一冊一逍遙院內府寶隆公手書本李孝  
經一冊一狩谷望之翻雕北宋本孝經一冊見目

記第三十三葉 楊紹康識



師竹齋吟草序

自劉子駿七畧以儒冠諸子而醫書別爲一略漢以後志錄家沿襲之儒與醫塗徹遂顯判而文苑方術傳記家亦莫能合一斯古今之通患也然古來通人魁儒如皇甫安葛稚川陶貞白之倫通醫學宋有蘇沈良方者蓋蘇子瞻沈存中所論著而洪文安亦撰方書今所傳宋本洪氏集驗方是也國初以來傳青主徐靈胎皆工詩文而所撰醫書亦極精博蘇沈之流亞已竊謂古名醫如仲景丹溪東垣何嘗不精通儒書特嘗患爲醫所掩而蘇沈諸先生以文節名世

又罕見其能醫此學者所爲廢書而太息也吾鄉風俗樸塞文士治舉業外於他學罕有津途而習醫者又多習流俗歌括未有能通儒者獨洪明經子遷少以能文馳譽庠序尤工爲詩既長以多病精研靈素諸書遂以儒而精醫名重一時踵門求診者無虛晷宦斯土者亦爭相延致適館授餐禮敬恐後以是南遊閩越北攬吳會名益盛而詩益富今年六十衰其生平所作詩凡二百餘寫定爲茲集余讀其詩冲淡夷猶時構精語體綜唐宋而不爲塗涇蓋其得於性情者深矣同人皆慙慙付梓以傳之世俾後之讀茲

集者知子遷以爲良醫而爲詩人不以方術掩其所  
學則蘇沈之文朱李之術兼而有之君家文安安能  
專美於前乎至君所著醫書尤富將續刊布以餉學  
者斯又非余所能贊一詞者矣



題跋

書影宋鈔殘本永嘉四靈詩後

毛扆汲古閣珍藏刻本書目有宋本四靈詩三本藏經紙面此書久矣失傳幸而得此雖後有缺實至寶也

世所傳四靈詩皆選本此集爲宋刊全集之舊蓋从影宋本迺錄者以校讀畫齋本二徐集多詩百餘首惜靈機集缺其半翁趙兩家則又全佚然在今日則殘缺中之足本矣同治己巳三月過吳門得此於玄妙觀書肆庚午十月讀一過書此時余方養溫州經



籍志也

惟此中十日始一與書我知余古卷最微

與此中三日本其向欲三日三日是門計此於

計書縣其始其半會既與我限又全好幾身合便

得不本學給給以錄前書流本二往其之往可論

惟此中十日始一與書我知余古卷最微

與此中三日本其向欲三日三日是門計此於

計書縣其始其半會既與我限又全好幾身合便

得不本學給給以錄前書流本二往其之往可論

惟此中十日始一與書我知余古卷最微

與此中三日本其向欲三日三日是門計此於

刻竹軒雜著跋

右竹軒雜著六卷宋太常少卿永嘉林公季仲所著少卿从橫塘許忠簡公學於伊川為再傳弟子建炎間以豐國趙忠簡公薦入朝後以疏阻和議與豐公同黜其師友淵源及立朝風節皆卓有可紀而宋史不為立傳雜著十五卷亦久散佚故全吉士祖望脩宋元學案亦以公遺書不傳為憾乾隆間與許公橫塘集趙公忠正德文集同於永樂大典錄出始復傳於世雖掇拾之餘編帙殘缺不及原書之半而忠謹遺文沈霾千載幸際右文之代佚而復顯豈偶然哉

詔讓襄讀李秀巖道命錄所紀建矣紹興間趙張秉  
政道學興廢始末嘗嘆豐公首參大政即以振興舊  
學為己任程門弟子若伊胡諸賢次第拔擢而浮薄  
之士或掇拾伊洛緒論以干進至公貶而專門之學  
垂為厲禁公昔時所拔引者或改名它師以求免禍  
而反覆若陳公輔輩乃至反顏護詬以相傾陷幾不  
知人間有羞恥事少卿則自建炎間以豐公薦為察  
官豐公罷政少卿亦出知泉州及豐公再相又與劉  
大中等同登剡牘至紹興戊午和議將成豐公以議  
論不合罷相少卿亦引夫差句踐事力爭之遂以得

罪其出處大節與豐公始終無二今觀此集與趙參政書凡十二篇其九皆豐公謫潮陽以後所寄其所慰藉之者無所不至至欲效司空表聖從王疑謫商州故事而以母老不能觸氛霧相從于南海之濱爲憾嗚呼若少卿者真不負豐公者哉家大人旣以橫塘集付刊以此書流傳尤少亦并校刊之至陳伯玉所傳沮和議疏大典本已佚不存今檢徐夢華三朝北盟會編所載尚其全文謹據錄入以補闕本之闕焉



刻橫塘集跋

宋元豐間作新學校吾溫蔣太學元中沈彬老躬行  
劉左史安節劉給諫安上戴教授述趙學正霄張學錄  
焯周博士行己及橫塘許忠簡公景衡同游太學以  
經明行脩知名當世自蔣趙張三先生外皆學于程  
門得其傳以歸教授鄉里永嘉諸儒所謂九先生也  
蔣沈二先生皆未仕而卒其仕者戴明仲趙彥昭張  
子充官皆不達周浮沚劉左史給諫昆弟幾達矣而  
二劉官不過侍从浮沚由館職出為縣令以歿未嘗  
得尺寸之柄以昌其學也至於汲京傾沒中原淪於

完顏伊洛太師既歿存者永嘉諸先生亦多先卒不  
及見南渡之興惟忠簡馭歷中外建炎初首參大政  
雖扼于汪黃甫進即退齋志以沒不獲竟其設施然  
勲節顯著爲世名臣蓋元豐九先生惟忠簡獨後卒  
名德亦最顯厥後永嘉學者後先輩出多于忠簡爲  
後進或奉手受業其門靖康建炎之際永嘉之學幾  
墜而復振于忠簡誠有賴哉忠簡所著橫塘集三十  
卷宋時刻于台州郡齋見陳耆卿嘉明中葉後散佚  
不傳乾隆間始以永樂大典輯出重定爲二十卷蓋  
九先生遺集傳於今者惟浮沚集及左史給諫集與

此集而四周集存者不逾十卷二劉集才四五卷此  
集雖殘缺之餘視宋本已少三之一然較浮沚集卷  
帙已倍之瑋文鴻筆大都具在奏劄三卷多建炎間  
政府密勿之議後之君子將欲觀忠簡學業大略與  
其立朝所建明者可于是乎求之然則吾鄉九先生  
不徒名德惟忠簡最顯其傳書之多亦無及忠簡者  
此非後學所當寶貴者哉重輯本珍度秘閣未有刊  
帙藏書家展轉傳錄譌互頗多家大人曩從吳興陸  
氏寫得一本復從祥符周氏得別本以相讐校甄著  
同異定為此本光緒己亥奉命開藩東鄂會永康胡



月樵文領書局遂屬擇匠刊板以廣其傳大典本所  
佚而見於他書者尚多擬掇輯之別爲補遺竝他日  
并刊之至朱子所偁許右丞陳少陽哀詞者詒讓以  
周益公平園續彙攷之實許崧老翰所作崧老建炎  
間亦爲尚書右丞與忠簡同官哀詞非忠簡作也四  
庫總目以爲橫塘佚文蓋當時纂修諸臣未及檢覈  
故滋疑悟今特爲舉正俾讀此集者無疑焉

刻蒙川遺稿跋

劉忠肅蒙川集宋史本傳及忠肅弟成伯敘並作十

卷今所傳遺稿四卷乃明廣東左布政使永嘉阮籽

存畊所輯刊非足本也十卷本國初時猶有傳佚故

黃俞邵倪閣公並據以著錄而朱竹垞經義攷載忠

肅集有太極說中庸大學說又云目錄有濂洛論語敘

朱所見本洛謫作溪遂以為周子論語注誤也辨詳余所著溫州經籍志今本並無其文

是其論也然阮槩本世亦罕覯弄藏家展轉遂寫食

誤甚多乾隆間收入四庫全書館臣任讎勘者不守

蓋闕古義或以意為彛綴迺至改成伯序十卷之文

以合今本卷數而於書未賈鎔鏡墓誌殘缺不可讀  
者則徑削之咸豐間忠肅裔孫永沛等得傳鈔閣本  
以活字印行又輯佚文六篇爲補遺一卷校覈不宥  
復有刪易於是忠肅遺集不獨元本不可復見而阮  
編本亦點竄無完膚矣同治戊辰詒讓應禮部試報  
罷南歸道出甬東購得寫本尚爲阮編之舊乃得盡  
刊今本之謬家大人遂命校刊以廣其傳大致悉依  
舊寫本其有奪誤顯然者乃依閣本活字本畧爲補  
正稍涉疑似者則區蓋以俟續勘又原本有小注數  
條似非出忠肅手其遊興教寺詩注規駁本詩廼不

知鄧志宏別號耕欄傘陋殊甚蓋亦明人所加也今  
以舊寫本所有姑附存之



書校顧亭林詩後

亭林詩集六卷傳校元鈔彙本

潘稼堂刻本并爲五卷

以潘刻

本勘之得佚詩十有八篇潘刊所有而文字殊異者

又逾百焉

潘刻亦有初印及重修之異修板本缺字珠影初印本並與元鈔本同今不備校

謹校寫爲一卷嗚呼蘭晚贖馥桑海大哀淒迷填海之心膠落佐王之學景炎蹕去空傷桂管之蟲沙羲熙年湮猶署柴桑之甲子据茲一掬之煤莫恐化三年之碧血偶付掌錄讀之涕零後之覽者儻亦亮其存楚之志而恕其吠堯之臯乎蘭陵荀羨

集外詩注中間有佚事張氏顧先生年譜咸失載疑



餐菊軒詩草跋

晉劉子駿列女傳頌有云惟若辯通文辭可從范蔚  
宗敘後漢列女亦取才行高秀不專一操是知藝林  
舒藻無間闔門昭華鐫芬尤珍辭翰劉范所論弁若  
合符至今代實齋章氏文史通義婦學一篇昌陳古  
誼矜示別裁遂欲刊彼才華範之德象尊詩禮之隆  
槩抑擊悅之浮辭校諸劉范情趣殊異竊綜而論之  
唐山古歌爰著劉略顏峻專集亦登隋篇最錄日錄  
馨逸競播雖復文麗蜚華或未禮嚴踰闕高樹繩檢  
蓋其所宜至於大家史才宣文禮詒女宗高行兼擅



文章以此繫榻則又何間寶齋之論爲已褊矣餐菊  
軒詩集一卷蒙自伍太夫人之所著也太夫人爲故  
奉賢令君楊公之配蘊姿開令懿德柔嘉詞翰之妙  
凌邈左謝同治之季奉賢君待銓江東攝治劇邑時  
直巨寇翦蕩悍卒恣橫未究厥施奄遭奇變太夫人  
雪涕正衾勢面陳狀卒使忠悃祿微克邀優典凶黨  
駢首靡遁刑章奇節既彰慈誥彌顯大府臚告溫綸  
褒嘉蓋非徒麗晷芬郁播譽玉臺抑亦卓操昭焯炳  
垂彤史者也穉虹大令夙奉慈規蔚爲儒吏紆綬下  
邑忠政有敷臺草重迓麻沙精刻聖善之訓遺此一

編杯圈之息渺焉千古家君昔與奉賢君爲同歲今  
於大令爲部民稔誦芳徽曩著題詠詒讓幸與校讐  
彌景風烈故輒遠甄劉范之言近撫實齋之論略申  
平議附表暇郵至於太夫人之詩含思澹逸樹體隱  
秀足以探散怡於南雅嗣適響于唐音讀者當自得  
之固無俟於揚推矣

楊紹廉按伍太夫人名淡如號晚香雲南太和知縣  
伍熊炳女奉賢令君名溥字虹舫道光丁酉拔貢  
稗虹名文斌以蔭得官曾任瑞安縣令

一、...  
 二、...  
 三、...  
 四、...  
 五、...  
 六、...  
 七、...  
 八、...  
 九、...  
 十、...

曾祠百詠跋

右題曾文正公祠百章余友長洲朱君中我之所著也祖孟榮本事之例志湘東懷舊之思失覺宛在風雲護此儲胥赤舄不歸感愴溢乎豪素信申德之嘉頌冠倫之奇作也原其敷指蓋以公功贊中興學洞聖譯傳副柱史銘書大常凡此昭焯無勞藻詠然而葛侯逸事郭沖撫承祚之遺鄭公諫書思忠續方慶之錄麻沙雕棗搜昌黎外集之文瀉化鑄珉撫謝傳近問之帖雅譚有述佚製閒傳論其珍賚并逾球璧而况平津翹材特開三館山公啟事別為一書經惟

講藝問難擬於鄭鄉戎幕論文最錄富乎元匪以逮  
雲臺耿冠之奇記室阮陳之妙莫不隸旄麾而樹勳  
望斗極而知歸此又讀公是弟子之記未必皆詳寫  
庾公參佐之名不無遺略者矣朱君雅村遵躒嘉藻  
紛綸公乘家學抱許祭酒之遺書士衡妙年與張司  
空之賓席永懷鮑叔知我之雅彌深隨會誰歸之慨  
茲以薄游鍾阜重謁芬楣錦城廟古登少陵之高哦  
黃石祠高動宣遠之遐感楚賢呵壁無閒攬口之衷  
子牙輟弦永絕焦桐之契爰託柔翰口口口心附綴  
舊聞存諸細注將以播芳埃口口口資遐討於遙年

傳季友云微管之歎口口口深君其有焉詒讓曩游  
冶城曾窺南口口口論學死著籍於韓門小子通家  
亦昧口口口座永惟疇昔同此依歸十載如馳九口  
口口載誦斯詠益復恨然昔遺山中州之集資修史  
於金源王偁東都之編甄頌詩於石介是則百篇著  
錄雖風雅之嗣音而三長奄擅寶陽秋之具體後之  
攬者可以知君之志矣



書干常侍易注疏證後

干令升易注南宋以來久佚散文粹義略見於陸氏  
釋文李氏彙解近代集本有屠曾張惠言孫堂馬國  
翰四家惟張本間有箋釋然甚疏略於干氏義例未  
能詳述也此書爲吾鄉方雪齋教授所著校釋精備  
遠出諸集本之上又以干易義本孟京以孟京例校  
干詁大較符合別爲集証一卷以廣其義干書雖亡  
得此足見其槩矣棠本藏教授曾孫中矩所余從訪  
得別錄爲此冊手彙朱墨粗互未爲定本今以意窠  
校董理之集証尾葉理爛文缺未敢臆補謹仍其舊



神聖默示氣魂其氣默顯天經本始顯能所其萬  
物德歸或此照卡素未墨味五未然笑本今以意東  
野五夫良其藥笑受本齋是野曾外中賦酒余為語  
千發大神符合保然其功一衣以顯其產千書難白  
靈函滿看本生之入以千也本道本以五帝國財  
諸聖靈出此書或吾懶衣言無於野前來味野醉的  
解四害謝服本則百步跡無善解如係千六真國本  
神天本以蘇牒並外蘇本百然實能德舌能堂出而  
千今其意致南宋以來入始始天降集多思與對以  
書中第對也或能對對

跋王居士甄塔銘

王居士甄塔銘歐趙皆未著錄國初時於終南山樞梓谷出土未幾即孰近世所傳完拓大抵皆重撫本僅存匡郭無復神采不足觀矣此孰石原拓本存字雖不多要是數十年前舊拓較之陝西碑估所鬻本不啻天壤若川姻兄嗜古若渴偶獲此拓重裝屬題漫書數語以志眼福



碑銘

誥授光祿大夫浙江溫處兵備道童公神道碑銘

光緒三十一年七月溫處兵備道寧鄉童公卒于位於是兩郡士民念公教養之德淪浹肌髓相與具牘臚陳於行省請奏宣付史館既而陝西士民亦以公在陝治行上陳如溫處蓋公以乙科起家崇建勳績敷歷監司生平宦迹在陝最久威惠周洽感化至深而其在浙則適當國家更法自強公奉行禱贊方將大有所經畫而未竟者尤多斯皆士民所爲感念悌悼而不能忘者也公諱兆蓉字紹甫一字芙初世爲

湖南寧鄉人少孤家貧力學沈毅有大志弱冠補縣  
學生同邑故陝西巡撫劉果敏公典深相推重同治  
丁卯舉於鄉試禮部報罷時果敏方治兵三原馳書  
聘公襄戎幕以統軍勦寇積功保舉府同知晉知府  
道員用奏補陝西興安府知府調西安府擢浙江溫處  
道歷署陝西榆林府漢中府延綏道漢中道西乾廊  
督糧道浙江杭嘉湖道積階光祿大夫累次薦舉循  
良第一軍機處存記加鹽運使銜晉二品銜頭品頂  
戴賞戴孔雀翎公之初至陝也劉果敏以公知兵舉  
行營事悉以相委旋檄兼統防軍所部多皖亳降卒

毓戾不循軍律公受事巡視縛其魁桀數人駢斬之  
疏剔訓練卒成勁旅時金積堡回首尚負岨勢甚熾  
回騎數千由正寧竄三水涇化公扼涇化口子頭迎  
擊大捷既又觀北山兵變亂卒戕統帥高勇烈公西  
安大震以公過其衝不得逞由是威望驟著湘軍宿  
將咸歎服自愧不能逮也及補官治郡則首務葺雍  
盜賊撫綏彫邊秦邊故多伏莽興安僻遠在山南介  
三行省之衝復丁回捻諸匪屢擾之後荆棘滿地公  
密布方畧次第爬梳前後獲劇賊郭家發張北海唐  
林盛周蠻刀鄒日標等置之法沿漢數千里姦宄屏

循常遺文上  
迹四川萬縣賊郭雲刀等竄入陝紫陽境公率軍擒  
斬之比撫檄至則寇已平兵後屬境彫敝公銳意爲  
籌教養興安士習命陋公議拓校購書招其雋士集  
官齋親講授經史大義指示文法儒風驟盛又以邊  
氓貧窘勲識字命廣設學社以訓其子弟復教之樹  
藝畜牧以裕其生計番回襍處性悍警易爲亂公始  
爲回民籌資立學風尚爲之丕變榆林城臨榆溪河  
數潰決爲害公親督工楛治浚紅石峽三年渠成灌  
溉利溥一郡尤精究荒政光緒丁丑關中大旱赤地  
千里榆邊饑民無慮數萬涂草相枕藉郡倉有積粟

故事必先請而後發公以災亟請將不及議以便宜發振道與令懼謹持不可公力爭不顧卒如公議先發倉而後以牘上總督左文襄公深嘉其知權議修城隍俾以工代振復運粟於包頭寧夏籍戶口施振單騎巡視歷八九月勞瘁尤甚災後繼以疫癘榆林前後三令皆死於疫道繼之公以守攝道與令事親齋醫藥按戶拊問診視所全活無祿僚友謙從多染疫亡而公備歷艱苦心力卒瘁獨奉然無所苦人咸謂盛德之報厥後庚寅再任興安又值大饑爲請帑四萬金治振乙未大水民多漂溺公親歷漢陰紫陽



安陸三屬發倉施振葺廬埋胔民不知災辛丑温州  
颶風潮溢濱海堤塘田廬漂沒圯壞不可勝計玉環  
樂清及海中靈崑各島被災尤重公捐俸千金佐以  
鹽釐餘羨委員施振復爲築塘疏水撫習災民給籽  
種俾復業壬寅溫處饑復籌鉅款購米江蘇鎮江上  
海請截留冬漕一萬二千石運溫設局平糶而以餘  
金儲穀備荒其時又值溫疫日死人數十公於酷暑  
烈日中親巡行城廂設病院聘醫施藥療治者甚衆  
其規畫纖悉詳至論者謂足繼榆林之政信不誣也  
又善讞疑獄周慎平恕不事刑林而多得其情在漢

中嘗平反鳳縣死罪五人興安平利黃老五安康蕭  
張氏獄皆附大辟公廉知其枉一鞫得直盡釋之其  
移西安也巡撫魏光燾知其平允以讞局委公平反冤  
獄尤衆公又以貪吏猾胥藉勢爲姦利尤痛嫉之興  
安府役及船牙素橫恣擾民公至汰其名員數百僅  
留數十人嚴繩以法受賕者斥無赦甚者杖殺之嘗  
巡視漢水堤工遇總兵余虎恩泛舟販私錢公詢知  
之率健卒圍其舟大索盡燬其錢數萬緡鎮標兵暴  
橫莫敢撓者釐局胥苛擾商人索賄總兵與局員皆  
庇之公檄索不得密遣隸掩捕治之無所貸會安康

令以徵糧逾章民譁圍令署公親往撫諭始解總兵  
局員以前事銜公因構飛語謂公激變廵撫鹿傳霖  
將巖劾總督譚公知公賢竭力保全僅得解任蓋公  
宦陝十餘年勤政愛民治行卓著多類此溫州自與  
歐美各國通商開埠內治外交重事咸兵備道主之  
公至又適當庚子亂後朝廷方更新法度政而俗吏  
多循常蹈故不能奉揚明詔公獨曠觀遠覽知非教  
養不足以振衰拯弊首檄守令廣開小學堂購書頒  
給俾士林有所津逮又飭屬縣遴高材生各兩人俾  
赴日本學習師範實業捐俸爲治裝人飲銀圓百由

是風氣大開新機漸暢又開蠶業學堂以西國飼蠶  
新法教士歲遣人購湖桑秧十餘萬株分諭士民領  
種復設工藝局集輕罪頌繫及無業游民教之捆屨  
織作行之數年感化甚衆又嘗以官奉使助湘省中  
小學堂明德學堂益昌商旅學堂及邑子游學日本  
學賞前後皆巨萬金蓋公所至必惓惓於教育嗚呼  
教養不舉則凡百新政無所施公其知之矣自同治  
初元朝廷戡平大亂湘軍勛績冠一時將相監司布  
列各行省而宿儒舊將多持高論嚴守藩籬以擯異  
族逮甲午倭議成時局驟更舊論稍絀而新學漸孳

戊戌更化湘中諸豪俊奉行新法尤銳厲無前蓋老  
成者率重變古而少年者多喜更新兩議斷斷未有  
所定惟公儒文俠並兼資博綜而高掌遠蹠精究時  
務獨能通新舊之郵而祛其偏駁綜論生平治兵以  
律馭吏以嚴忠亮廉平憂時愛國有古名臣之風非  
夫識燭幾先量周域外其能躋於是乎曩者日俄協  
議浮議遽起謂強隣環伺將有大變公憂憤抗擊密  
電江督魏公請亟籌備俄大計願毀家以取軍又請  
招致豪傑蠲除黨禁所陳皆中機要魏公不能用也  
溫州自庚子和議後景教勢焰熾矣教士干預獄訟

撓我主權公申明條約公法之痛抑之瑞安民楊茂  
奴與天主敬積忤法國神甫趙保祿挾兵船至溫索  
之必欲置之重辟公引義力爭聲色俱厲保祿卒絀  
去蓋公居平端謹若不能言臨大事則義憤勃發執  
節不撓類如此公夙嗜宋儒之學清節厚德照耀一  
世在漢中嘗以行邊宣播盛德却蒙古王名馬珍物  
之獻而於家則捐金累萬購置義田贍族又立學以  
教族子弟湘撫上其事傳旨以樂善好施嘉獎賜扁  
建坊鄉里榮之斯咸世俗所稱述者在公蓋不足紀  
己公生于道光戊戌閏四月二十二日卒于光緒乙

已七月十六日年六十有八始祖嗣興明季由江西  
遷寧鄉城南企石岡曾祖普盛祖開萬考道袞皆以  
公貴贈光祿大夫曾祖妣氏易祖妣氏賀妣氏黎夫  
人氏張皆贈一品夫人張夫人泉測室楊宜人皆先  
公卒三子長府學生同知銜候選知縣光嶽次花翎  
陝西候補知府光策三兵部武庫司學習員外郎光  
業女一適善化陳口口孫六人錫梁錫蕃錫瓊錫陞  
錫霖錫琪孫女八人曾孫女一人詒讓猥以同歲之  
雅得屢侍公清燕乙巳公開溫處學務分處於郡城  
以總兩郡教育俾讓理董其事於公平日循政粹德

見聞最詳深感公教養之惠大有造於我鄉而惜未  
克竟其施也光嶽等將以口月奠公於寧鄉口口山  
之原以書來告謹爲撫其犖犖大者表之墓隧以示  
來者且以誌吾浙人之不忘公也銘曰

文吏雍容恣坐嘯坐致公卿百無咎禕瀛疑信隘戶  
牖簿書眯目但存舊童公閱達天所授儒文俠武鬱  
衷抱治軍關隴初試守塵回晤冠掃氛雩享蘇災澹  
績屢報樹之嘉禾孳厥莠校舍萬區甄賢秀民戴公  
仁如覆燾帝覽剡章錫豸繡南來甄括政愈懋明詔  
更新縣星宿新機灌蒟彌宇宙繫公贊契若圭瑁興



學劭農貴先務學僮頌策得諷籀俊士治莊集博島  
新政萬端民不擾風移識啟公所造天不憇遺凡中  
壽厥施孔多悌未究我紀公德質亨昊湘水可枯石  
不朽

誥授光祿大夫頭品頂戴二品銜賞戴花翎浙  
江溫處兵備道童公墓誌銘

公諱兆蓉字紹甫一字芙初世居湖南寧鄉縣城南  
企石岡明季有諱嗣興者由江西遷寧鄉為公始遷  
祖曾祖普盛妣氏易祖開景妣氏賀考道衰妣氏黎  
三代皆以公貴贈光祿大夫妣皆一品夫人公少孤  
貧不能具饘粥族兄圭農太史資給之俾就學艱苦  
泮屬文行斐然甫冠補縣學生領同治丁卯科鄉薦  
時湘楚諸名臣方勘平粵寇而檢回構亂秦隴騷然  
同邑劉果敏公典巡撫陝西與公為雅故馳書禮聘

遂參帷幄果敏治軍三原俾總營務旋檄領防軍別  
部皆皖亮降卒悍鷙不易馭俾公兼統之受事巡行  
斬渠桀數人更易部署無敢譁者時回首據金積堡  
賊騎數千由正寧竄三水涪化公率偏師迎擊之涪  
化口子頭大捷論功擢府同知賞孔雀翎會北山兵  
變統帥高勇烈公被戕叛卒趨西安公以孤軍抗其  
衝賊莫敢越蓋公以儒生起家領軍屢建奇功威望  
驟隆諸宿將莫能埒也繼襄李提督輝武營務復督  
全省軍需積勞擢知府以道員用加鹽運使銜光緒  
丁丑題補興安府知府署榆林府時秦晉大饑榆林

尤甚急命發粟振之道與縣執故事須先請公曰郡  
距省千八百里必請而發民皆溝中飢矣脫有罪吾  
當任之卒以便宜開倉振給事上總督左文襄公亟  
嘉之復運粟於包頭寧夏按戶施振單騎巡視歷八  
九月所全活無算會疫癘大作幕僚僕役死者相踵  
榆林令以疾卒邑無令調於延安受事未一日又卒  
代者慙莫敢至未幾道亦卒公乃兼道與令事比戶  
巡問爲具醫藥體素強至是亦心力交瘁顧獨不染  
疫咸謂至誠所感事聞加二品服庚辰檄署延榆綏  
道履任郡屬荒僻士僊而民貧公增拓學舍購經史

集士勸學甄其才俊入署親以經義文法指授之又  
以樹藝畜牧教民俗為之變榆林城臨榆溪河頻年  
河溢為災公自督工槌治浚紅石峽三年渠成溉田  
萬頃民至今利之壬午履興安任嚴治墨吏滑胥初  
府縣吏役名員數百公汰存數十人繩以峻法受賕  
逾五緡者斥甚者杖斃鎮標兵為奸利總兵頗護之  
公擒決無貸嚴禁私錢陝西總兵余虎恩販私錢數  
萬緡公訶得盡燬之釐捐局役榜賈人索金公牒索  
役就質不得來間掩捕之笞役幾死丙戌安康令徵  
漕不如章民譁圍令廨公躬往諭解總兵及局員某

以前事銜公至是誣爲激變巡撫鹿傳霖將嚴劾總督譚公鍾麟持不可然猶解任調省旋復署漢中府己丑就攝巡道次年復回興安郡適游饑前後請款四萬餘金治振惠澤周洽與榆林埒甲午四川萬縣寇發秦邊震動巡撫檄詰公務持鎮靜寇入紫陽境潛率兵擒其渠郭蠻刀餘衆皆潰丙申秋調補西安首郡治尤繁劇巡撫魏光燾知公賢凡吏事軍政悉倚以辦三攝西乾廊督糧道手訂徵糧改折章程上下稱便蓋公官陝最久在興安前後逾十年久道化成氏愛之如父母所至嚴治盜賊興安當川楚衝兵

後伏莽滿地公初至盡芟雉之沿漢數千里道路晏  
然權漢中及再任興安所獲劇盜魁桀無慮數十人  
悉置之法尤勤政愛民折獄如神在漢中平反鳳縣  
死罪五人興安平利黃老五安康蕭張氏獄皆効大  
辟廉得其寃悉出之最後在西安讞局亦屢平反寃  
獄大吏以循良第一累薦得旨交軍機處存記蓋上  
邀簡眷駁駁將大用矣庚子遂擢授溫處道甫至署  
杭嘉湖道次年始履本任時中外欵議初成景教勢  
張甚吏治叢脞積案至數十百起公首飭清釐庶獄  
親慮囚按名訊問選吏督鞫以便宜讞結凡教民訟

獄輒依理律持平治之無所寬假教焰由此少戢瑞  
安民楊茂奶與天主教積釁法國神甫趙保祿必欲殺  
之挾兵船至溫索茂奶甚急公援據公法約章力爭  
之保祿厲聲詰責公毅然曰彼於律不當死不能殺  
人以媚爾必強我者請繫我至都與爾對簿於外部  
保祿氣阻茂奶卒獲全辛丑六月颶風為災玉環樂  
清及濱海靈崑各島潮溢壞塘堤田廬無算公捐俸  
施振復撥鹽釐餘羨四五千金委員履勘為築塘疏  
水招集流亡計戶口給籽種以各屬糴貴復發款萬  
餘金俾購米鎮江上海又請奏畱冬漕萬二千石運



溫分屬平糶復以餘金儲穀二千石備荒其爲小民  
籌生計周悉多類此公器量忠亮抗擊時事知亟宜  
變法自強會朝旨宣布新政公實力奉行而尤銳志  
教養以溫處士學疎陋多拘守故常乃剴切勸捐諭  
購蒙學教科書十餘種頒各廳縣俾多設小學堂復  
資選高才生每屬二人人欵銀圓百俾治裝赴日本  
學習師範實業由是風氣開通擔登渡海者踵相接  
又以兩郡利源未闢民生日窳議興蠶桑以救其敝  
捐金數千采購桑秧以十餘萬株計招士民領種建  
蠶桑學堂於郡城集生徒教以中西育蠶新法平陽

樂清咸有分局蠶桑大興復開工藝局凡輕因頌繫  
泉無業罷民悉收入局懲艾之教以手工粗藝行之  
數年所感化甚眾又議開商會以振商務設溫處學  
務分處以宏教育條緒揃具而公遽卒蓋公在溫五  
年口猷閱算所經畫而未竟者甚多咸謂早暮當有  
峻擢以大展其施而不意其止於斯也公生於道光  
戊戌閏四月二十二日卒於光緒乙巳七月十六日  
年六十有八在秦以捐振晉頭品頂戴積階光祿大  
夫同邑張氏贈一品夫人側室楊氏馳贈宜人皆先  
公卒三子長光嶽府學生員同知銜候選知縣次光

策花翎陝西候補知府三光業兵部武庫司學習員  
外郎皆幼學篤行克紹世德女光玉楊出字善化陳  
口口孫六人錫梁錫蕃錫瓊錫陞錫霖錫琪孫女八  
人曾孫女一人以口月葬於口山之原公平居敦慤  
寡言笑而治軍察吏嚴明周慎不可干以私遇事務  
持大體不爲苛細憂時愛國出於天性尤通達時務  
以邊患方亟瀏覽報章輒鬱懣填臆癸卯冬訛言俄  
日協商旦暮有瓜分劇變憂憤成疾致密電江督魏  
公請弛黨禁招致豪傑亟籌拒俄策未能用也性淡  
泊清操絕俗其在榆林行部至府谷邊民盜耕禁地

懼獻金自贖公受之而命悉以糶粟儲倉備振及去  
任蒙王以珍物名馬餽堅却不受皆歎息去凡官俸  
所入咸以充義舉於杭則以漕款二千金爲錢塘江  
義渡資於家則置義田數百畝以贍族又手訂條約  
設義塾教族子弟賙卹遠族逾萬金湘撫奏旌溫旨  
賜扁建坊捐俸本省小中學堂明德學堂武昌湘旅  
學堂費及邑子遊學日本學費與修路恤棧前後殆  
逾二萬金卒之日公故里及陝浙士民聞之多感泣  
相與具牘臚陳德政請宣付史館其盛德感人如此  
詔讓鄉舉忝與公同歲而踪跡睽違未嘗一瞻顏色

泉簡兵溫處始得以部民修謁感時局之艱棘慨歲  
月之不居賓坐雅談輒復竟日以是獲聞公之治績  
甚悉比公卒光嶽等以狀來屬為志墓之文謹為綜  
緝大畧俾刊於石而繫以銘

湘江衡岳篤萃英豪中興勛牒稷禹夔皋童公躬躬  
奮跡文儒蘊才種德蔚為時需初襄戎幄遂蹈劇寇  
剖符榆邊惠問迭奏文翁脩學長孺發粟髦士彙升  
災黎蘇復帝省剡牘寵以豸章爰蒞甌括仁風載揚  
利溥桑土化騰鄉校媻此矯虔愴彼景教胡圖徂謝  
未竟厥施士民述德鬱此去思公去不來茂績孰嗣

盛德載福繩繩孫子岡陵表瑞莫寔崇所刊此貞石  
永昭億年

Blank columns for vertical text.

誥授武節將軍晉贈廣威將軍雲騎尉温州中  
營千總許君暨子廣威將軍雲騎尉瑞安營  
候補外委許君兩世墓誌銘

君諱嶽中字君渠世為瑞安許氏自宋忠簡公景衡  
以來族姓繁衍世有令名祖庠生灝潛德不曜贈振  
威將軍父松年舉乾隆丙午科武鄉試積官福建水  
師提督封振威將軍賞雲騎尉世職提軍公為水師  
名將嘉慶間從李忠武公長庚擊劇寇蔡牽朱清勛  
績懋著事具姚觀察瑩印員外懿辰所為傳誌君少  
聰穎提軍公最所鍾愛勝衣就傅讀書通大義既長



以將家子習騎射隸溫州鎮標軍籍恂恂儒雅無貴  
遊子弟豪侈之習少從提軍公諳練營務兼嫻習火  
器歲時校藝投石超距恒冠其曹伍人皆以將材期  
之咸豐辛亥署額外外委隨總兵葉炳忠巡海於北  
龍南麂諸洋面獲盜陳阿彩劉聰燕等置之法以功  
請補瑞安營外委旋署右營外委調左營升署中營  
千總辛酉粵匪犯浙巡撫王有齡檄調溫標兵助防  
時承平日久將弁咸不知兵每奉檄徵調輒驚愕失  
措撫檄至溫同官咸畏懦莫敢應總兵以君家世名  
將有文武材委領授師君慨然就道既至杭分守清

波門匪大集團城數重餉餽盡絕君知其不支尤撫  
循疲卒日夜登陴固守比城陷君率所部巷戰不知  
存亡後數月有潰卒從城中逸歸始知君於城破日  
力戰死事狀時辛酉十一月二十八日也距生於道  
光甲申九月十六日年三十有八當事以狀聞於朝  
得旨優恤入祀昭忠祠加贈雲騎尉世職襲次完時  
予恩騎尉罔替君娶葉恭人無子側室金恭人生子  
繩丞襲世職字雲侯才識開敏有父祖風自提軍公  
薨逝諸子各擁厚資不問家人會計事家遂中落贈  
廣威君殉節時雲侯僅五齡葉金兩恭人守志撫孤

生計益乏雲侯既長以外委入營餉糈殊薄復不足  
以自給乃務撙節積累兼習商務以是家計漸充裕  
以加三級晉階四品封廣威將軍贈父母如其階營  
中諸將領亦雅重其材駸駸向用矣光緒乙未九月  
二十五日不幸得疾遽卒距生成豐丁巳四月二十  
一日年僅三十有九娶金恭人生子繼澤字小侯襲  
雲騎尉世職雲侯卒後三年繼澤年僅二十有二亦病  
亡提軍公嫡孫曾無復存者嗚呼提軍公以忠亮武  
毅受仁廟特達之知專閫授鉞功在國史晚為總督  
某以私怨劾之罷職人咸惜未竟其用方冀其子孫

賡續迭起克踐世功而不意其遽止於是也贈廣威君既以忠義上膺褒卹雖仕不逾材官騎將而臨危授命能不墜其家聲獨惜雲侯壯年隸軍籍不獲一試而中道隕折又亡其嗣豈亨屯之運有不可以常理論歟抑三世為將天道所忌有信然者耶是固非人所能測矣贈廣威君昔與先仲父侍郎公為僚壻雲侯與寒族申中表之好故詒讓知其家世功狀最悉壬寅正月贈廣威君葉金兩恭人暨雲侯柩厝於三十九都對息山之原以繼澤暨婦王氏祔於墓次而介葉恭人之姪縣學生葉鈇屬詒讓為誌其墓謹就

所知綴緝之以示來者而系以銘

雲山湯湯環我安陽太嶽之冑世德孔長宗簡巨儒  
學承伊雒緯武經文千齡繼作提軍眈眈虎虓龍驤  
剪彼鯨鯢海波不揚廣威邁迹援荆誓師吳山風慘  
馬革不歸壯志未伸有子克嗣恢厥家聲清芬勿替  
何圖奄忽遂掩黃鑪蘭芽繼隕悴此芳渝四葉蟬聯  
故家喬木過眼煙雲荒邱華屋功苗忠裔不隕厥名  
千秋萬歲視此埋銘